



08. marts 2012

UPA 2012/55

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqiuppara:

**Mellembølgikkut nassitsissutip atorunnaarsinneqarsimasup 2013-ip ingerlanerani taartigisinnaasaannik periarfissiisoqaqqinnissaa anguniarlugu Naalakkersuisut suliniuteqaqqullugit Inatsisartut aalajangiiffigisassaattut siunnersuut.**

(Inatsisartuni ilaasortaq Debora Kleist, Inuit Ataqatigiit)

### **Tungavilersuut:**

Mellembølgikkut nassitsissutit februar 2011 atorunnaarsinneqartussanngormata ilisimatitsissutaavoq mellembølgikkut nassitsissutit pisoqalivallaarneri aammalu kingoraartissaanik sanaartortoqarunnaarnera pissutigalugu nunap immikkoortuisa ilaani KNR-Radio tusarnaarneqarsinnaajunnaassasoq.

Tamatuma kingunerisaanik Nunatsinni innuttaasut ilaasa KNR radio-mik tusarnaarsinnaanerit periarfissaajunnaarpoq, taamaasillutillu pingaartumik savaateqarfinni najugallit, sineriassuatsinni umiartortut ilarujussui aammalu sinerissami piliartorlutik sivisuumik asimi imaluunniit qeqertani najugaqartariaqartartut nutaarsiassanut, inuiaqatigiini ineriartortuni pisunut assigiinngitsorpasuarput malinnaanissaminut mattunneqartutullusooq inissisimalerput.

Mellembølgikkut aallakaatitsissutit atorunnaarsinneqartussanngormata ilanngullugu ilisimatitsissutigineqarpoq silassamik ilimasaaruteqartarneq nalunaaruteqartarnerlu, pisarnerut sinerissami radioqarfiit VHF-ikkut sullissinermut kanaaliisigut ullormut sisamariarluni aallakaatinneqartassat. Tamanna qujanaraluaqisoq ajornartorsiutitaqarpoq, tassami kangerluppasuit ulloq manna tikillugu VHF-ikkut suli anguneqarsinnaanngillat, taamaalillunilu mellembølgikkut nassitsissutit atorunnaarsinneqarnerisa kingunerisaanik silassamik ilimasaaruteqartarneq nalunaaruteqartarnerlu asimiitilluni kangerlummiitillunilu naalaarneqarsinnaanera killeqartorujussuanngorpoq.

Tamanna Nunatsinni innuttaasut sumiikkaluarunilluunniit inuiaqatigiini ineriartortuni pisunut assigiinngitsorpasuarput aammalu silassamik ilimasaaruteqartarnermik KNR-radio-kkut malinnaasartunut toqqissisimananngilaq, pisariaqarporlu nassitsissutinik nutaaliaasunik ullutsinnullu naleqqussagaasunik allanik periarfisseeqqinnissaq.

### **Aningaasarsiornikkut allaffissornikkullu pisortanut kingunissai.**

Raatiukkut nassitsissutit nutaaliat ullutsinnullu naleqqussakkat pisortanit aningaasaliiffigisariaqassapput. Mellembølgikkut nassitsissutaasimasut kortbølgikkut nassitsissutinik taarteqartinneqarsinnaagaluarput. Nassitsissutit taamaattut atorqealissagaluarpata Tele Greenland-ip 2007-imi naatsorsuisimanera aallaavigissagaanni 6 mio. koruuninik aningaasartuuteqarfiussagaluarpoq, nassitsissutit ingerlanneqarnerannut ukiumut 500.000 kr-it missiliorlugit aningaasartuutaassallutik.

**Aningaasarsiornikkut allaffissornikkullu namminersorlutik inuutissarsiortunut kingunissai.**

Siunnersuut uumasuutilinnut, imaatigut inuutissarsiortunut aammalu asimi inuutissarsiortunut allanut iluaqutaassaaq, taakkumi qangatut KNR-raatiup nalinginnarmik aallakaatitaat aammalu silassamik ilimasaaruteqartarneq tusaasinnaaleqqissagamikku. Kortbølgikkut aallakaatinneqartut tusaasinnaassagaannili pisariaqassaaq 400 kr. missiliorlugit akeqartumik kortbølgikkut aallakaatinneqartunik tigooraavimmik pissarseqqaarnissaaq.

**Aningaasarsiornikkut allaffissornikkullu innuttaasunut kingunissai.**

Siunnersut sunngiffimmi pinngortitami angalasunut tamanut iluaqusiissaaq, taakkumi qangatut KNR-raatiup nalinginnarmik aallakaatitaat aammalu silassamik ilimasaaruteqartarneq tusaasinnaaleqqissagamikku. Kortbølgikkut aallakaatinneqartut tusaasinnaassagaannili pisariaqassaaq 400 kr. missiliorlugit akeqartumik kortbølgikkut aallakaatinneqartunik tigooraavimmik pissarseqqaarnissaaq.